



UNIVERSITÄTS-  
BIBLIOTHEK  
PADERBORN

## **Bibliotheca Rhetorum**

In quo Causae Forenses, Liber Epistolarum, Liber Fabularum, Et  
Oratiunculae

**Le Jay, Gabriel François**

**Ingolstadij, 1726**

Prolusiones ad ineundum certamen Philosophicum. Pro Thesi D. Guillelmi  
Briconnet.

---

[urn:nbn:de:hbz:466:1-71049](https://nbn-resolving.org/urn:nbn:de:hbz:466:1-71049)

citudine reliquum est, studio impendas sedulus, & in absolvendo egregio illo ac laborioso prorsus opere, quod in Concilia sacrâmque Traditionem incredibili eruditorum omnium gaudio & expectatione moliris, jam pridem strenuè colloces; ut invisus nulli, nemini non gratiosus omnium existimatione & amoribus perfruaris!

Sed quò me studium tui, præposterum fortè, quantumvis ardens ac sincerum rapit; ut tibi unus non amicus fiam, dum hæc palàm commemoro, quæ clam esse modestia tua frustra voluerit. Abstineo tamen pluribus, Ecclesiæ Princeps Illustrissime, ne Patrocinii tui, ultrò quod offers, ne benevolentia tuæ, quam impensius ambio, fructu videar excidisse.

## PROLUSIONES

Ad ineundum certamen Philosophicum.

*Pro Thesi D. Guillelmi Briçonnet.*

**I**Nvitus à te tam humaniter, ut cæteris aperirem disputandi contra te viam, unum poteram subvereri, ne, cum illis in promptu sit, de te quid sentiant, palàm & apertè citràque invidiam omnem aperire; mihi propter veterem necessitudinem, quam assentationi proximam vulgò jaçitant, gestientis animi sensus efferre in medium non liceret.

Verùm abundè provisum est timorì nostro, dum eam fecisti existimationem tui, quæ nemini obscura sit. Nòrunt quippe omnes sagacitate.



ingenii tui, quod intricatissimi abstrusioris Philosophiæ nodi non impediunt; nōrunt constantem & assiduam in Litterarum studio diligentiam, quam labores nulli defatigant; nōrunt candorem illum suavissimæ indolis, cujus illecebris omnium devincis animos; nōrunt ingenuos, & ad singula cū pietatis, tum urbanitatis officia compositos mores, quibus cæteris exemplo esse meruisti; nōrunt, inquam, hæc omnes, &, me vel tacente, prædicarent.

Perge tam secundis auspiciis, Nobilissime Adolefcens, ad amplissimos honorum gradus, quos Illustrissimi Majores tui non virtute minùs, quàm nominis sui gloriâ consecrârunt. His illi instructi præsidii, quæ jam in te tam feliciter adumbrat suspicimus, ad eas dignitates, quæ sunt in Foro & in Clero summæ, pervenerunt. Testis mihi Robertus Briçonettus, quem mira vis ingenii, eruditio perfecta, summa dicendi laus, singularis rerum usus, vigilantissimi Præfulis in Ecclesiâ Rheimensi defunctum muneribus ad supremam Cancellarii dignitatem evexere.

Testis Guillelmus Briçonettus, Vir maturitate judicii, integritate, prudentiâ, fide clarissimus, qui Archiepiscopus ac Primas Narbonensis cū jam esset, sacrâ Purpurâ postmodum decoratus, denique ob navatam Carolo VIII. difficillimis in rebus operam regni totius administrationi præfectus est.

Testis Augustus Franciscus Briçonettus, cujus memoria recens adhuc in Majore Concilio, ubi Primi Præsidis tantâ cum dignitate partes non ita pridem sustinebat, eum nobis exhibet Virum, qui sic mollescere nescius visus est, cū jus & æquitas postularent, ut in cæteris nemo foret illo ad omne genus obsequii paratior; sic retinens gravitatis,



vitatis, ut eam ad consolandos miseros, quibus erat parentis locò, ultrò deponeret; denique sic infimis pariter ac summis venerandus, ut esset quoque carissimus.

Tu verò, qui vestigiis tantorum Virorum, quantum ætas patitur, jam insistis, Nobilissime Adolescens, cum te olim suum Curia vindicârit, tam florebis \* in Foro Juris Legûmque peritiâ, quàm politionis Litteraturæ laude, dum esses nobiscum, floruisti. Ut neminem passus unquam es, qui non tibi laboris studio esset inferior, sic assiduitate, diligentiam cæteris aliquando prælucebis: & quam in solvendis involutis quibusque Philosophiæ ambagibus dexteritatem atque solertiam nunc exhibes, eandem tunc in dirimendis litibus implicatissimis exhibebis.

Atque ut uno verbo complectar omnia, domesticarum virtutum æmulator, sicut festivitate ingenii, urbanitate morum, pietate, comitate in omnes Matrem amantissimam, ita contentione animi, doctrinâ, opinione probitatis Illustrissimum Parentem referes; quem non tam generis splendor, & illius, quod gerit muneris amplitudo, quàm judiciorum scientia, labor, vigilantia, sincerum æquitatis studium, candor animi, & singularis quædam fucique omnis expers humanitas commendant. Verùm sentio, dum tuis gentisque tuæ laudibus immoror, præripi à me aliam laudis materiem, quam tu tibi ipse ingeniosis responsis facturus es. Quamobrem, &c.

## ALIA.

\* *Dictum olim probavit eventus. Præsidis in tertiâ Inquisitionum Curia munere defunctus, magnam in rerum Forensium scientiâ laudem adeptus, & incredibili omnium desiderio ante annos extinctus est.*